

24/04/2001

Saya mahu berehat: Daim

KUALA LUMPUR, Isnin - Kehadiran Menteri Kewangan, Tun Daim Zainuddin, yang sedang bercuti ketika pembentangan Rancangan Malaysia Kelapan (RM-8) oleh Datuk Seri Dr Mahathir Mohamad, hari ini menarik perhatian media.

Sebaik saja Perdana Menteri selesai membentangkan RM-8, Daim kelihatan antara yang pertama keluar dewan, menyebabkan wartawan, termasuk wakil media asing berkejar untuk mendapatkan reaksi Menteri Kewangan itu.

Khabar angin kononnya Daim berselisih faham dengan Dr Mahathir menyebabkan kedua-duanya menjadi sasaran terutama, daripada wartawan asing, yang ingin mendapatkan kepastian.

Pada sidang akhbar di lobi Parlimen, Perdana Menteri tidak terlepas daripada pertanyaan media sama ada benar berlaku perselisihan faham itu.

Perdana Menteri secara berseloroh berkata:

"Saya baru lawan dengan dia (I just fought with him). Sebab itu dia datang untuk mendengar suara saya (ucapan di Dewan Rakyat) tadi. Saya tidak tahu mengapa dia datang kerana dia sedang bercuti, tetapi seolah-olah dia mahu mendengar ucapan saya, seperti orang lain, seperti anda yang juga mahu mendengar."

Sebelum itu, ketika dikerumuni wartawan, Daim berkata beliau sihat dan keputusannya untuk bercuti selama dua bulan bermula awal bulan ini, cuma mahu berehat.

Berikut adalah antara soal jawab wartawan dengan Daim:

Media: Tun sihat?

Daim : Sihat, alhamdulillah.

Media: Adakah Tun akan berhenti (daripada Kabinet)?

Tun: Saya sedang bercuti (gelak).

Media: Tetapi dua bulan adalah terlalu lama, adakah Tun memulakan langkah untuk keluar (daripada Kabinet)?

Tun: Anda yang cakap.

Media: Mengapa Tun bercuti?

Tun: Mengapa? Adakah saya tidak berhak untuk mengambil cuti?

Media: Adakah Tun letih, inikah alasan untuk bercuti?

Tun: Saya ingin berehat.

Media: Adakah sekarang ini masa yang sesuai untuk Tun bercuti dengan keadaan ekonomi semasa yang kurang menggalakkan?

Tun: Ia cuma kelembapan.

Media: Adakah Tun akan pergi ke luar negara untuk menarik pelaburan?

Tun: Tidak, saya hanya pergi ke luar negara untuk menghadiri mesyuarat Bank Pembangunan Asia (Mesyuarat ini dijangka diadakan di Honolulu, Hawaii Mei ini).

Terdahulu, ketika Daim yang juga Ahli Parlimen Merbok memasuki dewan menuju ke tempat duduknya, penyokong kerajaan terus menepuk-nepuk meja sebagai tanda sokongan.

Khamis lalu, Dr Mahathir mengesahkan Daim mengambil cuti selama dua bulan dan Menteri Pembangunan Usahawan, Datuk Mohamed Nazri Abdul Aziz, akan mewakili Daim dalam Kabinet.

Malah, kehadiran Daim juga hampir menenggelamkan perhatian media terhadap satu persidangan antarabangsa tadbir urus korporat yang dirasmikannya di ibu negara, pada jam 9.15 pagi ini.

Namun, menyedari kemungkinan itu menteri berkenaan siang-siang lagi dalam ucapannya menyatakan bahawa beliau tidak mahu perkara berkenaan berlaku.

"Saya berharap seminar Tadbir Urus Korporat yang penting ini tidak akan tenggelam berikutan minat terlalu mendalam di kalangan media untuk membincangkan mengenai cuti saya selepas ini.

"Saya tidak dapat turut serta seperti biasa untuk menjawab soalan-soalan panas daripada rakan-rakan media. Saya sebenarnya akan terus ke Parlimen (lepas perasmian ini)," katanya pada penghujung ucapannya di seminar itu.

Pelbagai khabar angin timbul ekoran tindakan Daim untuk bercuti selama dua bulan.

Media yang datang lebih ramai dari biasa itu juga dikatakan berminat untuk mendengar sendiri dari mulut beliau mengenai rancangan ketika bercuti.

(END)